

四庫全書

集部

欽定四庫全書

集部

默堂集卷一至五

詳校官起居注事臣顧宗泰

主事臣呂雲棟覆勘

總校官中書臣朱 鈐

校對官助教臣蔡 鎮

謄錄監生臣張仲芳

欽定四庫全書

集部四

默堂集

別集類三 宋

提要

臣等謹案默堂集二十二卷宋陳淵撰淵字知默一字幾叟沙縣人楊時之弟子也紹興七年詔舉直言極諫之士以胡安國薦除御史遷右正言官終宗正少卿淵在言路多所建白以忤時不獲大用榜所居之室曰默堂

其文章皆明白剴切足以見其氣節宋藝文志載淵集二十六卷詞三卷此本詩十卷文十二卷共二十二卷為門人沈度所編度及楊萬里有序又別本十二卷題曰存誠齋集蓋淵嘗以存誠齋銘示學者故後人以名其集也有文無詩第一卷末較此本少啟三篇第九卷末較此本少書二篇字亦多所訛缺未若此本之完善今故据此繕錄焉乾隆四

十四年八月恭校上

總纂官

臣紀昀

臣陸錫熊

臣孫士毅

臣

總校官 臣陸費墀

欽定四庫全書

提要

默堂集原序

自孟子沒道學失傳異端競起淺聞多歧莫適所從不求其本而從事於末六經載籍為之晦蝕學術頗僻汨喪良性不知夫聖人之所以為學徒相率為口耳誦數之餘夸多鬪靡以文辭相矜漢唐以來以儒名家傑立而不世出者有矣然論性有以為善惡混有別而為三品者故論篤者莫之與也夫性萬物之一源非有我之所得私也性而不知其離道而違仁也遠矣宋興河南

二程夫子受學於濂溪周茂叔先生講明道學究聖賢之蘊發千載不傳之妙學者趨之如水赴壑時惟龜山楊先生覩奧入室尊所聞而行所知盡得其傳焉明道德之歸以覺斯人以善天下然是道也不絕如綫則有陳公知默以剛明果毅之姿得師友源流之正自其少也親炙了翁而翁器之謂能任重而致遠及其後見龜山先生師事執經不憚寒暑其始遺之以書致篤信好學之義與孳孳為善之說及夫伊尹之所覺周公之所



思孔子之所貫顏子之所樂而質諸龜山自是服勤三紀漸摩道德之場明致知格物之理究窮六經考其至當之歸其著述微辭奧義窮幽探賾使斯文之不墜為世模楷豈區區漢唐之士以多文自富務為辭章以驚眩末俗所可比擬哉故平居踐履立朝進退莫不以是無慙古人之大節果以是垂後而名世不幸遭擯斥于時宰不大施于用而齋志以沒學者至今悲之余昔從公受業左右幾二十年嘗以存誠齋銘示諸學者謂萬

欽定四庫全書

默堂集  
原序

物皆備于我非自外得反求諸身而已反身而至於誠則合內外同物我無分於天人且成己乃所以成物學者有進於斯則何患不造古人之域余服膺高堅因得其遺文五百一十四篇釐為二十二卷序而刻之廣諸同志苟有志於學者探索而求之則源流固有在矣公諱淵字知默榜所居之室曰默堂故後學以默堂先生稱焉其立朝節槩則有行狀在可攷而知也紹興十七年三月日門人沈度序

予來毗陵之數月欲於事外陰求是邦之良士未暇也  
一日有秀才陳生輅者來謁予貌甚野氣甚靜予固異  
之坐之而扣其挾則吃吃言伊川之學予益怪焉蓋是  
學也今之大夫久矣其諱談也不惟大夫也今之士亦  
然而生獨不然其不可怪也乎問之蓋默堂先生陳公  
之子也然則其不諱談也又奚怪焉蓋昔者道學之正  
統八傳而至孔子若顏子曾子則見而傳之若子思孟  
子則聞而傳之統之至於孟子也其前無絕其後無嗣

欽定四庫全書

原序

嗣十有餘世之絕者不在伊川乎其學以天理為宗以致知為力以仁為寢以敬為守以誠為歸曠乎聖門之孔邇忽乎斯道之來前也一時之士從之學者豈少也得之者謝氏而止耳游氏而止耳楊氏而止耳默堂先生楊氏之高弟也且親焉吾聞其人矣吾仰其風矣未見其書也問諸輅則有文集若干卷就求而觀之其辭質而達其意坦而遠其氣暢而幽至於立朝廷當言責正君心排權臣蹇蹇不折也是豈今之所謂文哉蓋道

學之充乎其中而溢乎其外形乎其躬而聲乎其言者  
歟既歸其書于輅而輅請序於予予謝曰先生此書豈  
以序之作不作而為傳不傳哉序或不可以廢也亦必  
其人而後可也如予者豈所謂其人乎然士之驚于文  
也至于今亦極矣文彌工道彌邈極甚必反其不待于  
先生此書乎序此書予不知其可也一言以驗學者予  
不知其不可也先生諱淵字幾叟嘗為正言終官宗正  
少卿南劔人了翁之猶子云淳熙戊戌十月日誠齋野

客廬陵楊萬里序

默堂集原序

欽定四庫全書

默堂集卷一

宋 陳淵 撰

延平江上呈吳國華先生

青山如偉人可望不可制屹然瞰碧流  
龍翔虎豹視春風何時來草木舞深翠  
禽鳥暖相依飛鳴得真意誰言靜無作  
坐致無邊利願言斬茆茨結室傍蒼蔚  
且要觀此身功業亦細事

玉山驛見周東老題詩和之

塵勞千種祇紛紛之子歸來始一春掉舌不知何處去  
又還攜劒出南閩

立我軒

鄧南夫名其書院

是身猶逆旅真吾所寄耳若人問真吾本空何可擬立  
我物必隨我應為物使捐物更求我是以物為己文章  
鏡面塵富貴路傍屣胡為認而有展轉迷不已此迷自  
何得定以有我起達人齊萬變視彼猶視此墮然天地  
間形稿心如水獨有長存者萬劫不能死夷齊與盜跖



趣操定誰美是非儻難分物我那相訛君懷經濟心題  
勝故云爾我乏異俗才詩言亦其理

和人獨酌二絕

共矜春色盡銜盃文字紅裙各有儕何似西園閒處士  
一盃花下畏人來

休論身外千端事且醉花前一榻風舉盞但能邀皓月  
隔籬何必喚鄰翁

鄰有張生者病草勢不可救忽夢醫人鄧舜臣言

萬病圖如說服之遂安感而作詩

醫王脫超如蛻蟬幻身變滅成飛煙百年新盡火猶傳  
直驅神馬窮青天自從和扁不少延冀北萬疋今蕭然  
挾方儲藥人摩肩閒花野卉紛爭妍昨宵夢蝶正蹁躑  
忽忽神遇高人前舊交量見意終圓相顧眼笑如忘年  
因言癘疫興哀憐語我妙藥醒沉縣唯有岐婆世所賢  
此物病極猶能痊覺來攬衣視星躔明月墮落遙山巔  
挑燈草簡便求旃十粒入手收淮蠙平明攻疾才下咽

頃活始信真天全先生愛惜不忍捐尚念故國多凡緣  
祇應造物相留連閔此衆萬劫火煎故令丹成猶未仙  
妙畀神力司陰權世間愚術謀相先不計性命徒論錢  
誰能如公心不偏此詩義直何當宣付與末俗懲輕愾  
崇安分水嶺

已見江南草木菲筍輿愁下亂山圍但將雙淚憑西注  
寄語江神穩送歸

離紫溪驛

小風吹面雨廉纖  
輕薄衣裳懶更添  
一線離情裁不斷  
暮雲將過粵山尖

鉛山

欲留無計去還悲  
漸遠閩山物象非  
家在天南今北首  
忍看歸鳥背人飛

信州禪月院晚眺

一覺華胥日又曛  
晚來愁緒亂紛紛  
角聲對起重城近  
吹動靈山萬疊雲

舟中初晴

碧玉空江漾曉暉  
水光浮簾影交飛  
酒昏頭重慵扶起  
卧看蛟龍上客衣

登睦州環峯亭

月照空山杜宇啼  
喚歸漁艇夜天低  
那堪又是雙溪水  
獨上危樓十二梯

泊姑蘇憑匯亭候同行不至

扁舟繫岸五六日  
草屨遶亭十百迴  
欲行無計住不可

夢想萬事心如摧燕雀飛鳴意自適翩翩簷外相往來  
乃知荆棘殊不惡培風萬里真勞哉

吹韻李仲虎召伯相遇

區區千里為浮名小隱終慙鄭子真雙闕幾時瞻北極  
萬山無處望南閩尊前壯士今如夢勝下真王迹已塵  
共俯淮流追往事玉蟾依舊水粼粼

此地有樊  
噲韓信廟

重陽後送謹常兄之符離

鎖外分攜處離觴話遠途黃花看不足寒鴈去何孤農

圖非吾業衣冠本世儒應當慎行止無使世氛汙

九月二十二日秋舉失利出門用中相餞夜步河

上留別

太平今日古無鄰觸目郊原事事新年少自應迷鼓吹  
野人終是厭埃塵忘懷處世思同俗有事關心不為貧  
藥石有能醫久痼此生寧復怨垂綸

錢塘過廖次山以詩見贈次韻

往來江海兩年餘自怪鄉音已變吳樽酒每思難會面

客鄉何意復趨隅  
雨寒君未瞻天竺  
水涸吾妨適鏡湖  
幸此徘徊緩分袂  
笑談猶得對冰壺

次山有意游湖阻雨僕將適越水淺

未能去因此遂得  
久于錢塘相會

次韻欲游西湖阻雨

去年賞西湖薄暑  
扳躋難同游幸勝  
士酒沃衣巾斑今  
歲來錢塘臘雨  
扁舟寒友朋適四  
集局蹙樊籠間此  
生分林泉造物猶  
余慳未為登岳禱  
且作訪戴還無私  
本天理敢怨陰雲  
頑向來旱蝗惡征  
賦亦未寬寧令風  
作



雪要看麥堆山

蕭山覺苑寺雪後杜門

雪融簷溜如秋霖古寺掩關無足音詩書廢放道眼淨  
鐘鼓杳隔禪房深老僧勸坐媒以火茶鼎靜聽蒼蠅吟  
胸中激梗造澄澈一念不作千憂沉浮生半日未易得  
邂逅勝境聊安心明日孤帆落何許歲晚濁醪誰共斟

錢清待潮

江潮來去自有時扁舟閣淺心如飛岼容霜竹青照眼

春信雪梅香撲衣天寒鄞江道路阻歲晏錢清風俗非  
故園回首二千里落日看盡行雲歸

錢清過堰

小風吹樹寒流止始覺西江潮正起須臾倒卷縠紋來  
已沒岼痕猶未已江流自下河自高逆上更堪行罔水  
九牛回首竹索細十丈沙泥拒舟底舟師絕叫輦鼓喧  
觀者駢肩汗如洗未經破碎亦偶然得造漣漪真幸爾  
世間何事非人力計久終須倚天理他年我欲治河深

要使黃流貫清泚

蕭山雪中寄李修

南雪一尺餘茲事豈常有直恐春氣融不忍加以帚我  
友隔千里無人共觴酒披衣坐短蓬吟苦千呵手疾風  
穿簾幕陰霧低牕牖思君欲乘興奈此衣見肘吾生為  
已疎未即學耕耦要令天下肥自以一身後三登今告  
祥此意亦云偶端能歌豐年擊壤和田叟

過鑑湖

稽山霸業已蕪沒，賀老鑑湖今幾時。當年乞得亦清絕，  
不道後日知誰尸。人生底物吾何有，謬辱君賜寧非癡。  
遊人依舊逐勝賞，歌舞自昔皆塵泥。荷枯葦折洲渚出，  
深處不變清琉璃。汪汪萬頃撓不濁，坐令我憶牛醫兒。

季修欲之仰山預作詩送之

飄零今日海東偏，見子奔馳不自憐。洛社求師霜入屨，  
仰山尋隱草連天。白雲南望家雖近，壁水東來計已然。  
賴有從前息心地，不令塵土化流年。

病減枕上五首

堦草無期日自生，獨餘貧病破元正。  
春風一種生生意，誰道年來也世情。

飄零古寺倚江邊，高卧春風百病纏。  
造化小兒真戲我，不令歌酒趁新年。

多情春夢草生池，起欲尋芳力尚疲。  
未解維摩無一語，故應習氣欲題詩。

塵埃子石蒙蛛網，殘落霜毫暗蘚紋。  
未把語言為戲劇，

新年不作送窮文

三釜承親計已疎萬鍾行道果何如安貧未赴闍黎飯

信命寧裁宰相書

退之年二十八上宰相書

李脩有詩求公晦顏公書元次山碑銘既而公晦

和成使病者亦賦之

英雄仙去形骸竟空有遺銘卧荒草誰將後事付平原  
石刻長隨天不老古來筆法多神逸斷碣塵埃誰復掃  
顧無清議藹人間末技縱工何足道往年好古搜奇蹟

百過曾看爭坐橐直詞無復假軍容  
僭逆知公能辯早教兒祇欲傳家法  
揮金可笑歐陽媪豈知名義重丘山  
遺屨終令魯人寶此碑文墨兩奇偉  
千載漫郎猶有考當時談笑傲豺狼  
首領不求明哲保至今心畫落銀鈎  
逸若驊騮初脫卓先生年來好收書  
兼愛此翁忠有餘豈惟筆力求深造  
定要聲名不減渠

李脩舍舟趨諸暨謁劉元成獨泛錢清江有懷其人

人

人遠牛羊暮春深草樹滋野橋低映水溪岾曲紫籬風  
雨江湖思乾坤杖屨疑論心竟誰是短棹欲何之

聞許景受上書被召二首

九萬須憑負翼風男兒端不為貧窮當時三顧應虛出  
畢竟論功要有終

男兒出處欲如神莫謾將身過許人今日萬人看中鵠  
挾弓持矢且逡巡

聞公晦叔往廉州以詩送之

時了翁謫廉



宗之瀟洒玉為顏  
叔夜麤疎萬事寬  
天與海邊常瘴癘  
意令他日慣艱難  
功名自古誰能必  
忠孝于今衆所觀  
志士殺身當不顧  
小人懷土但求安

觀獵

蒼鷹黃犬五花驄  
木落風高箭上弓  
三穴若能搜狡兔  
九天方可下冥鴻

登奔牛堰山亭

桑陰濃處已深春  
小市喧呼迴不聞  
誰與山頭共遊戲

靜看禽鳥鬪紛紛

默堂集卷一

欽定四庫全書

默堂集卷二

宋 陳淵 撰

謁滿處沖歸以詩贈之

八年重見各蹉跎把酒論文奈別何行止未應經掃地  
是非安用辯傾河陽春屬和從來少流水知音不必多  
妙語驚人慵舉似歸來如學病維摩

處沖見和復次韻二首

高談無補自風波畢竟平生意若何萬里悞遊梁苑囿

三年悔寄楚山河

三年往來俱在淮海間

軒裳氣味情終可林壑

風流興已多賴有故人真遠器會看鵬翼九天摩

歲月空驚去若波樗材渾欲樹無何人情不似春生草  
末學方矜水灌河顧我欽欽徒意廣如君飄逸患才多  
周南縱復嗟留滯未便懸頭學揣摩

處冲又和頗及佛理亦次韻荅之

相逢雖許借餘波此理而今更問何便合形骸同槁木  
不須文墨騁懸河五千遺教元非實三萬藏書亦太多

此外別傳應有路鈍根無物可漸摩

處沖為棲神導氣之術每曉起得意成詩前後四

首次其韻

功名亦誤人自古誰能了老大欲退藏少壯知幾少彤  
墀班已齊宿鳥尚木杪豈無山林心路長天杳杳

少時自樹立勁氣干雲霄一枕夢初覺萬古心何寥年  
來畏禍機自悟空峽峽小窮不必送真隱誰能招

交關存龍虎脛申學熊鳥嬰兒檢奔放姪女棲窈窕神

仙豈無術自為志已湫晨興一炷香吾意窮三藐  
朝氣爽不昏清淨天無霞善惡兩相融世慮遺塵沙疎  
鐘下殘月餘響遞幽遐了失去來心淤泥出荷花

秋夕

衰榆弱柳未經霜已見飄零片片黃雨後晚風生戶牖  
莫將燈火汗清涼

七夕三首

北里南鄰錦綉陳萬端千疊日初晴收藏犢鼻何須挂

小阮猶難免俗情

天上銀蟾曲似鉤  
人間簫鼓萬家浮  
從來世事俱兒戲  
不獨秦娥乞巧樓

信馬隨車力不勝  
聊將觴豆樂交朋  
青樓乞巧真兒女  
我亦如今拙未能

七夕閨意戲范濟美三首

衡陽新鴈幾時歸  
惆悵佳人萬事非  
蓬首西風還拜月  
夜涼贏得露沾衣

經年不復到庭除又見秋風柳欲疎看罷巧樓歸小閣  
牀頭重檢近來書

祝君樽酒醉羅裳此夜應須石作腸幸自書生惡滋味  
那堪千里羨牛郎

九日登莊樓二首

久客驚秋意天涯思不窮三年猶北國萬里對西風時  
序悲歌裏乾坤醉眼中黃花一樽酒千古此心同

木落秋容淨時平國勢雄望雲心自遠采菊興誰同詩



酒浮生過功名一笑空留連憑痛飲冠憤任高風

次韻范濟美秋雨感懷

一別劒溪水三換京塵秋夜聽空堦雨歲月驚如流豈  
不念故國水清山亦幽螻蟻有微情未忍追浮丘平生  
老蒼交夫子賢其尤窮經三十年一字不見收賴有管  
城公落紙無金牛他時恐不免速達吾所羞

代句龍君輔上潼州令

卓魯當時事風流莫與班最成三載後名在兩川間桑

梓深聆德絃歌幸必頑牛刀淹試可驥足暫投閒偃室  
何當造膺門早許扳丹墀初受命墨綬遽言還何子方  
游學終童未出關梁園今萬國蜀道自千山籍眼終多  
白萊衣念戲斑歸期春服就潼水會承顏

同魏季脩雪中閒步二首

纖纖月色淡黃昏城郭千家雪炤人攜手望春同茗飲  
小坊燈火自相親

草草瑤池小宴終玉人招我廣寒宮歸來懷袖天香滿

月照梅梢雪未融

次韻俞德翁述懷二首

事業無媒祇漫勞平生於世一牛毛  
三年萬里看飛雪不向人前愧緼袍

飄泊天涯不繫舟又還窮臘動離愁  
軒裳瑣瑣知何者直自時平未肯休

寄內

去住初難料行藏只是嫌天高山簇劍江靜月磨鎌久

別平安否新愁覺夢兼雙魚何日寄迢遞歲將淹

春雪 太學

陰風度巖切密雪紛如霧虛牕覺逾明臘紙粘飛絮  
文書不掛眼對榻聊箕踞春愁暗乘人忽忽出非慮  
門前亦有酒官禁不可酤永懷傲江湖何當脫羈鼻

歲暮述懷寄安常兄

意廣詩餘怨才狂酒見真雪梅新賤淚霜月冷傷神短  
劍深藏匣哀絃久委塵良游惜遲暮雲物又驚春

三月十一日欲往荆南景德寺睡起呈曹令德

風門自開闔門外黃塵暮午衾溫留人春夢如飛絮我  
行指洞庭千里始頓屨僕夫呼起起寸心撮百慮此生  
睡不足正坐奔馳故四年四往來日月途中度美人亦  
念我贈以別知賦英辭粲星斗深語發妙悟坐起再三  
讀一一明月句何似謝所投靜默有佳趣

令德送余都門外眷眷惜別余恨不款作詩寄之  
行人不忍別遇酒輒醉倒僕夫怪何遲謬應行亦好憐

君如弟兄每見開懷抱天涯重分攜祖席都門道城頭  
傾落日酒盡迹還掃留連意雖勤晤語終草草君如汗  
血駒千里未脫皁我若隨波魚圉圉依寒藻去住各有  
謀聚散初不保惟餘一寸心耿耿遲君老

同楊遵道出京本欲作詩而吟咏久廢恐取道襄  
陽吊古遺迹遵道有作不能多繼也先以詩謝  
之

經年不作詩意到無好語強欲理短絢頽井暗塵土夫

子賢達流奔逸不受圉風流夢鱸後清德逼而祖文章  
守家法騷雅到前古屈宋或交綏曹劉真臭乳而我獨  
何人詞格本寒苦枯腸費搜攪况復久不吐胡為謬見  
假亦使郊繼愈無乃緣葭莩遂與噲等伍此行過襄陽  
倒指不旬數龐公亦安之孟子不可覩聲名向千載石  
刻餘羊杜山川空形勝耆舊一仰俯終當弔遺迹尊酒  
酌江滸恐君成感慨嚴韻儻見侮作詩謝不能亦以丐  
斤斧

十五日過許夜雨暴作明日行四十里宿於潁橋  
又明日晴書事

狂風撼平野沙礫眯兩目筍輿我與君道遠疲徵逐驚  
雷一夜發暴雨溢川谷平明泥沒趾寸步不容續我生  
賦窮蹇觸處背天福風雨豈不好行路非所欲中途聊  
息肩村驛何可宿我勞固其分端恐僵僮僕燎爐燃濕  
薪傍舍酒初熟安能浣愁腸但取充飢腹中宵耿不眠  
明月忽挂屋攬衣起視夜秣馬亦膏轂人情易喜愠天



道有翻覆陰霽那可知去去無欲速

汝州道中呈遵道

青煙漠漠柳依依落日雲中鴈北飛  
咄咄書空誰的會遲遲行道子同歸  
桑陰蓋地牛羊困麥秀漫山鳥雀肥  
向晚未知投宿處敗籬疎屋火煙微

承遵道和又用前韻書懷

端的荊州得所依羽翰終欲更南飛  
閩山萬里長牽夢蜀鳥千言只喚歸  
當日朋儕俱草澤而今兒女自輕肥

白雲南望三年客長是尊前誦式微

春晚書事

楊花撲面春如夢麥穗齊腰日似年多病不緣詩得瘦  
放懷全藉酒能仙

楊花二首

出處陶潛宅興亡煬帝堤  
窓扉容點綴原野自高低  
地迴樓難穩風高去易迷  
顛忙能幾日萍滿水東西

楊花入水

為萍

漫天方作雪糝徑忽鋪氈已是春如酒那堪爾似綿

木香花二首

翠袖青裙襯雪膚雨餘終日醉相扶祇應不使朱鉛汙  
獨抱幽香與世疎

直自江梅墮雪英便遲幽艷到清明楊花著地香初破  
乞與愁人一解醒

自入襄城即有山水之興路中稍賡唱因呈遵道  
風沙久迷神山水忽照眼鄰鄰碧玉梵疊疊青螺綰人

煙盛樂土草樹亦精產雲霞入杳冥禽鳥度盃醖放情  
千里迴悟意一笑莞胸襟得奇趣酬唱出新撰蟲魚怯  
嘲誚文史困鳩倂我詩實易成淡薄非佳饌君辭頗簡  
出巖絕類燒棧自應即退縮強爾取驚報微言固可錄  
狂論猶未刻勿使俗人知歸途畏書簡

和遵道楊花

金明池道綠陰稠萬點顛忙正可愁馬上只貪看舞雪  
不知飛滿帽簷毬

漫與

雲林恰恰鶯能友  
沙路行行蟻有臣  
雖有溪山供醉眼  
亦嫌塵土汙芳春

默堂集卷二

欽定四庫全書

默堂集卷三

宋 陳淵 撰

登峴山二首

五百年間一夢中  
登臨回首興何窮  
當時事業軒天起  
此日風流掃地空  
墮淚山頭春草長  
沉碑江上晚煙濛  
故令倦客成惆悵  
目斷斜陽不忍東

路過青山曲轉腰  
松門揪嶺背塵囂  
煙雲西望孤鴻沒  
舟楫東來一水朝  
忠義有懷空鬱鬱  
功名餘事漫寥寥

無人就與山西將緩帶輕裘敵自消

晚行

晚煙低掃樹千重一簇人家接遠空日暮荒陂行客盡  
只尋牛迹去忽忽

懷鄧南夫

大室經年疎玉塵數行何日寄銀鈎只應立我軒前柳  
滿眼飛綿綠正稠

立我南夫軒名

思安常兄



凌虛閣下煙波濶升俊坊前草木香歸去溪南春正好  
不應蕭索對松篁

春晚入荊州

綠樹連雲草濕煙亂花飄錦柳飛綿三春別我無多日  
萬點愁人又一年池館勝游空過眼江山佳處欲投鞭  
從君預覓清涼地准備南州五月天

早行

夢中聞得子規啼燈下驚呼馬亦嘶宿霧故迷山遠近

肩輿才辨路高低鷄鳴犬吠遙相應野草幽花自不齊  
待得晨光開霽色不知行道幾人迷

京師相善者鄉友四人各賦一篇以見其所慕

適正

淡薄不易親和平不可離平生一樽酒萬事醒復醉詩  
成橐不存物至情無累紛紛塵俗中笑裏有真意

載德

辭寡覺我喧氣定覺我煩沉吟孤鶴立戲謔陽春溫豈

不苦鞭策去馬終戀軒由來君子德寡怨非其恩

如愚

義重財自輕氣剛語還直毀譽不掛懷行坐頗自得浮  
生困局蹙世路亦艱棘思君膽如斗解我愁似織

令德

襟懷冬日溫容貌秋水淨惠然肯顧我蒹葭玉相映詩  
人固難肥酒客亦多病善保千金軀愛子清而勁

至荊州寄用中

前年攜手東水門秋月夜看黃流奔忽忽別話苦不盡  
鳴鷄吠犬催朝暾放船鎖外望回騎清淚滴滴如泉源  
飄零可念浪萍散得喪未把秋毫論閩山萬里阻歸計  
越國半年空斷魂竭來壁水就朋友聞子荆渚將魚軒  
尺書迢遞忽寄我消息久絕知生存妻孥同活似慰意  
伏臘不給誰可言但期君馬當北首豈謂我轡今南轅  
客鄉邂逅不易得想見妙語如春溫况聞邇來治經術  
蟲魚瑣細窮朝昏傾囊倒廩幸見示不須羞澁時所尊

用中既和成以示山口唐蘊明蘊明亦和再用前

韻呈二公

高城繚繞環居門草樹蔽日甍  
鼉奔踈篁轉影涼午枕  
卧看烏雀嬉晴暎清香一縷  
熱沉水濃茗十分烹壑源  
乘風欲效玉川子蓬萊無路  
心難論虛堂愁坐漠無語  
頃刻百慮空勞魂緬懷皇祐  
賢御史當日直氣何軒軒  
臧孫強諫宜有後奇士果見  
諸孫存流傳佳語忽到我  
展卷直讀皆微言平生廖子  
口如鐵肯為此友西其轅

故應目擊得深省千載無愧孔與溫更將餘力事酬唱  
巧注未以黃金昏古來求友貴勝已二子年德皆吾尊

容齋書事二首

南國餘梅潤東牆更竹陰門庭迂市井草樹似山林客  
寄吾家是齋居古意深微風過枕簟何有萬黃金

方丈孤城角風來夢亦醒分明更無事俯仰忽忘形小  
室塵誰掃空亭栢自青生涯任流轉天地一浮萍

和向和卿嘗茶

俗子醉紅裙羶葷敗人意花甕烹月團此樂天不畀諸  
公各英姿淡薄得真味聊為下季隱不替江湖思輕雲  
落杯醖飛雪灑腸胃笑談出冰玉毫末視鼎貴我作月  
旦評全勝家置喙傳聞茶後思便得古人配誰能三百  
餅一洗玉川睡御風歸蓬萊高論驚兒輩

寄謝用中

黃蘗無多法維摩不二門此間堪折柱吾道亦難言學  
者初何有師乎貴不煩十年成我志今日是君恩

得用中書有禮人不答之悔作詩解之

一時先達摠飄零亦有陽春世莫聽漫刺從來無處著  
曳裾今日欲誰經只應舊友頭空白難使新知眼便青  
射獵南山休夜出灞陵有尉宿君亭

送遵道

秋月隔疎簾光體終隱微捲簾試寓目萬里餘清輝人  
生異肝胆同一造化機君心乃余心南北非相違三年  
遲君來一見悟前非况乃度寒暑葭玉容相依與君忘



年交沒齒其庶幾月色亦良好君胡捐我歸

陳漕生辰

代楊丈作

六管陽初復前宵月尚圓長庚俄夢李崧岳故興宣膚  
使新恩數忠臣夙眷偏節龍開遠目衣綉聳華年日月  
聲名起風雷號令傳自應威動岳曾是力回天相國關  
中粟尚書地上錢委藏淹府庫飛輓亂車船南徠元歸  
地西方正拓邊定知新將飽尤賴我公賢赫赫蘭臺舊  
飄飄鳳沼仙終焉還魏闕聊亦駐荆川曲學聯珠履非

才汗彩牋千秋期鶴壽萬里附鵬騫

席提舉生辰

代楊丈作

朔風迎臘換堯蓂一葉堦前尚吐英天上麒麟來昨夢  
河東鷺鷥自時名錦衣故國今誰有棣萼中朝日更榮  
終上青冥環帝座弧南長並一星明

入荊州學四絕句呈昭祖

問舍求田不可遲十年羈落意多違須知澤雉樊中畜  
不及蓬鵠地上飛

拂天喬木映脩廊滿目簾間白  
芋忙曾是壁池疎散慣  
卧聽鳴鼓懶衣裳

短栢森森團積雪疎簷簌簌撼微風  
從前不道容齋好  
此景而今落夢中

明知安分即忘歸故倚春風看落暉  
叔度汪汪波萬頃  
未應如我苦懷歸

金鑾兩絕

雨過牕明夏簟虛紛紛鳥雀靜庭除  
維摩丈室無人問

一枕薰風聽粥魚

門外塗泥一尺深  
高車誰復更幽尋  
不因雨後看亭柏  
安得山僧數見臨

次韻楊丈夜寒直舍

天寒官舍轉騷騷  
敗壁飢蟲永夜號  
應對短檠呵凍手  
只將長卷掃冰毫  
官游久矣空環轍  
生事蕭然孰載醪  
亦有從前經國意  
拔賢人或望山濤

鑾輅鹽車等是勞  
便逢良樂肯鳴號  
祗應末路歌牛角

不及寒牕禿兔毫  
世事分明如昨夢  
人情端的勝春醪  
終當短艇從公去  
俯仰江湖戲怒濤

春日偶題

未可郊原縱曉鞍  
人間猶似有輕寒  
春光不似常年短  
過了清明更好看

次韻張從道三首

石首道中

足馬江村路長鞭  
短袂裘問民知所病  
驅御去如流霧

卷千山曉霜餘萬木秋古來奔走吏流落有奇謀

自建寧泛江至石首

江注天圍盡舟排浪陣輕舸容疎柳色秋氣斷鴻聲風  
日雖堪愛雲煙易妬晴鱸魚如有興好在未知名

月夜江行

吏隱飄然在一涯更堪行役退年華多情却有空江月  
長伴離人夢到家

次韻從道夜宿推院

誰遣參軍阮所長夜聽鈴鼓度修廊風流偶未逢狂客  
歌頌空驚逼漫郎莫恨驂騑早櫪要令松柏飽冰霜  
如聞委吏真勞擾不許歸田是孔方

送昭遠兼寄昭祖諸友

離腸如亂絲欲解紛無緒別話似泉源袞袞日夜注幾  
年見君文萬里偶相聚一日不易得矧茲寒暑度孤雲  
向北飛三鳳各南驚人生類泛梗後約亦何據傷心壁  
池東塵土暗歸路憑高極遠目不見藍輿去君如千里

駒奔放尤難御強使就檢繩不入駑駘步何當宴瑤池  
定欲求飛兔鹽車未可嘶俛首且羈鼻余生易語言開  
口初莫慮一從摩詰遊便省默默處何時遂攜孥入隱  
高山霧招君賢昆李靜坐契深悟濁醪聊共傾清境煩  
君賦況有林下人解道因風絮

寄內

明月向人圓愛之不忍睡坐久風露寒忽忽如心醉念  
君一適我所遇無歡意況乃久別離相思到夢寐我生



百不堪繆學屠龍技于今半世人升斗亦未遂賴有室  
中友素懷隱居志肯與梁伯鸞扁舟共東逝

默堂集卷三

欽定四庫全書

默堂集卷四

宋 陳淵 撰

奉酬楊達甫見贈

春風不世情暖入閒門草君詩其似之披拂逮枯槁平  
生金石友歲晚迹如掃一見楊夫子胸腹便傾倒間關  
六年別一字寄不早忽蒙錦繡贈光彩照龍藻嗟我獨  
何人揖我謂我好無乃嗜好偏收拾到羊棗從來詩人  
窮君亦行此道我亦從君遊山林不知老

小軒觀月呈興宗叔

茆簷手可攀修竹出簷上寒蟾漏疎明碎影羅屏障情  
知月色好達覽在虛曠東家富池臺端坐不能訪山林  
足寓目細大初無相但使人心安景物自清暢霜風中  
夜作曲沼金飜浪禽鳥斷飛鳴杉松起酬唱燎爐宿殘  
火尚可溫新釀數盃遣沉冥萬慮一時放誰能外形骸  
於世無所仰晤語一亭間頽然齊得喪

東家謂佚老堂也

流長亭

曹載德先登

江折亂山圍西來素練飛嵐光環石窵潭影漾松扉欲  
盡風前樹難忘草上暉但期流澤遠長與水東歸

再用送昭遠詩韻寄昭遠昆仲

六經學不傳誰能尋墜緒君家有師承不數虫魚注公  
子韋氏門粲若五星聚胸中容萬頃一一黃叔度人情  
悅紛華世路爭馳驚取樂須臾間轉首已失據余生未  
俗中蚤幸識夷路折桂從乃翁頻年麾不去冉有豈辭  
僕樊遲亦能御雍容荆渚間夫子步亦步初從言下入

筌蹄索魚兔終遂義中行良樂驅騏驎有時坐終夕收  
視息浮慮了了不可言明明有佳處別來能幾時心月  
翳雲霧諸郎幸不遠寄語多予悟坐為塵事撓空詠別  
知賦遙想玉華遊春夢如飛絮

京師與昭遠約遊玉華既而返舍以事阻爽約聞  
令德為和詩今作此他日當以示令德也

小軒閒題二首

舍南舍北梅墻裏墻外竹道然寄其間不見一物俗東

風將小雨夜漲春池綠俯檻數鱖魚仰簷送鴻鵠交情  
石投水坐客冰炤玉從容得此生已矣萬事足誰言南  
軒小正可陋華屋但恐世故撓不容長處獨

青山拱簷楹淥水鑒毛髮花香晚更清鳥語靜不聒客  
至不能飲舉觴聊自罰坐嘯激清風起舞弄明月是身  
如浮漚起滅在溟渤百年一彈指何者為不沒文章會  
消磨名譽易衰歇淵明吾之師茲理久已達

約令德郊行二首

簷柳搖風拂面低  
麥芽穿雪綠齊齊  
憑君便作遊春計  
莫待花繁去路迷

小雪纖纖蓋地皮  
一飈風過忽成泥  
東君似勸人行樂  
不使塵埃趁馬蹄

酬晏伯達

半生流轉任飛蓬  
萬里歸來興又東  
寂寞倦投揚子宅  
低徊却寄魯侯宮  
阻尋雞黍他年約  
長憶園林一醉同  
何日過君花下飲  
爛看濃艷舞春風



錢塘書懷二首

遠客真秦贅清時謝楚狂  
斑衣辭故國青佩久殊方  
世俗蠻爭觸余生穀似臧  
正須逃姓字母使異庚桑

客舍連朝雨春愁醉夢如  
白雲千里目黃犬萬金書  
所幸交情薄從來世事疎  
只應狼毫尾空自詠歸歎

錢塘學中寄伯思六言五首

門外鷺鷥短夢牕間雨送  
清寒亦有惜春情緒分明  
不奈花殘

點點榆錢委砌冥冥柳絮穿簾日暖野禽爭食紛紛忽  
墮危簷

劒水庭闈底處苕溪水月彌深綠草年年離恨白雲日  
日歸心

世路紅塵可厭人情白首如新便可閉門端坐不須開  
眼看人

部伍亭前歸路鳳凰山下蕭齋我自無聊不住君如有  
興重來

雪中入國門寄令德三首

紛紛輕薄欲誰從  
愛子從來臭味同  
千里遠來應念我  
速須鞭馬要從容

此生於世已心灰  
自笑都城十往來  
為有飢寒餘慮在  
故應隨俗強低回

誰能一飲卷千鍾  
分付閒愁入酒中  
共向重樓看曉景  
一天飛絮舞春風

下汴

參天古柳鳴蟬急  
卷地黃流轉岬多  
好去扁舟穩扶柂  
秋風吹水易揚波

過淮

天高秋月涼風定  
秋水清扁舟淮海間  
愛此一葉輕微生  
久羈旅艱險已飽更經今  
幾往來始見波浪平  
篙師且停櫂莫遣魚龍驚  
吾行欲安之要待東方明

登召伯斗野亭

落帆新城曲維舟  
古河右幽尋得危亭  
星斗穿戶牖西

風掃殘葉庭宇不待帚娟娟雲間月亦復照杯酒明朝  
又東南汙流映衰柳莫以此時心熾然分淨垢

過浦城贈王令長源二首

化龍潭上濯滄浪夢筆峰前憩小棠十載不辭淹簿領  
一同聊欲課耕桑經綸未展風霜力文采空餘錦繡腸  
莫歎窮荒縻驥足萬人飢凍要扶傷

半生流落倦塵埃聞說英名首重回畫虎自慙非妙手  
割鷄空復嘆高才北堂戀戀思歸夢南浦忽忽惜別杯

此去山林真已矣看公雲翮振風雷

題綠波亭

南浦江波綠陽關柳色青夕陽千古恨分付短長亭

還舍

半生走長途所冀亦已微田園已蕪沒及此徒手歸妻  
孥攜幼稚相望天一涯所嗟垂老親甘旨不得時季妹  
復未嫁長姊貧且嫠皇皇三十口未欲聽所之平生道  
義交歲晚無晨炊豈不念我貧閉戶長苦飢高門多自

足我復拙言辭已矣可奈何顏公猶食糜

鄧元孚待制挽詞四首

從容紹聖末直節更誰攀不見豺當路懸知虎在山石  
渠聊試可江國竟投閒尚冀調金鼎那知去不還

永泰君臣分欽慈母子恩淵衷雖有在孤迹自難論身  
去朝廷遠名垂簡策尊祗應延閣命猶未厭興言

季父恩稽報平生不自安諸郎方未命猶子遽先官義  
氣今何在高風衆所難惜哉耆老逝閭里欲何觀

越岼方投紱將回出岫雲楹間俄夢奠地下修文落  
日川原靜悲風草樹薰但令千載後掩涕想餘芬

與楊如愚四首

文章初不計工拙言語何常識重輕不向故人齊物我  
一生懷抱為誰傾

半生蹤迹辱泥沙胸胆初無獻子家臧穀亡羊俱可念  
不須蠻觸故紛拏

十年相見不予疎亦記平生戲笑無縱有伯禽堪寓意



可能終不記狂奴

谷風淒怨不堪歌奈此人情世態何流俗但隨憂樂轉  
故人應合起頽波

存誠齋夏日呈龜山先生二首

長者一牀室先生五柳門度人聊示病觀物欲忘言小  
圓池臺足薰風草樹繁杖藜隨處處歸鳥報黃昏

雙檜軒之北高梧戶以南午陰臨短夢曉吹落清談闕  
老三無喜嵇生七不堪天涯復相值此意得重參

答朱晉老見責不赴會

屠龍事業初何有  
畫餅聲名不願求  
春色未闌猶足賞  
亂花深處要追遊

達觀軒 延平學中

林杪飛空出拱枅  
登臨高處亂煙迷  
雲鵬擊水南溟近  
霜劍凌空北斗低  
千里江山圍萬井  
一潭風月納雙溪  
同誰此地呈胸腹  
下視囂塵萬不齊

宿仙霞聖仙寺呈伯思子靜二首

風物吾鄉似山川地勢分稻畦翻碧浪麥壠布黃雲客

舍常爭席山僧獨獻芹芡菜餘瀝在耶餉僕夫勤

夜泊聖仙

老僧以芡菜酒見餉其餘可以飲僕

曉日山原靜薰風杖屨輕開談時造極得意自難名奔走非前計淹留見俗情賴渠金石友端的慰平生

### 通州夏雨

長風卷地驅炎暑暴雨翻空送晚涼只此蚊蠅俱掃跡不須追遞待秋霜

延平林力道閣上觀水二首

千重翠巘分三岫十里寒潭合兩溪  
更得橫流吞險瀨  
豈嫌春水濁如泥

要看春水拍天流更為溪山一日留  
誰遣白雲迷眼界  
坐令歸思入扁舟

兩浙周提刑生日

淮南草木亦知威故國重看衣繡歸  
不用埋輪留魏闕  
故應持斧靜園扉  
天瞻柳舍雙丸會  
地應棠堦五葉飛

此日長庚來古夢  
孤南終並一星暉

默堂集卷四

欽定四庫全書

默堂集卷五

宋 陳淵 撰

看論語四首

明明孔聖能毋四的的曾參所貴三一  
部魯論開聖域  
古人無死要重參

天道文章豈兩岐雷聲淵默本同時  
如何子貢能言者  
說與無言更有疑

陋巷從容一事無不因鄰闢出吾廬  
簞瓢豈是忘憂物

自是從容樂有餘

直從堯舜以中傳又到尼山續斷絃看取子思親的處  
始知論語自無偏

夢得亭上

雷霆卷地灘聲急旌旆搖空樹影寒千古西山留爽氣  
雨餘容我倚欄看

留別鄧南夫四首

平生交友各飄蓬只有丸丸雪後松萬里歸來還往絕



獨君時許略從容

昂昂勁氣初無作蕩蕩奇胸久息機  
容我醉時開譴論  
一軒明月夜忘歸

有子才如汗血駒新門高大可容車  
故應袖手藏深渺  
憐我冰霜涉畏途

比余於玉有奇文一落泥塗十二春  
慚愧深知同鮑叔  
尚言荆璞定逢人

十二年前南夫有玉說一篇送予入太學其文甚

美今子被貢適三上故有是句

越州道中雜詩十三首

心息久相依息調心自住忽焉不自知根塵失所寓向  
來尚有錐今我已忘兔似入無功鄉不由嵇阮路

暴氣燎原火淺量盈澮水不見楊關西此生真已矣誰  
言佩褱由不作緼袍耻至道儻有聞客塵如脫屣

世儒讀論語未脫小兒氣豈悟無絃琴中藏千古意顏  
淵默然處曾子亦心醉處處儻逢渠字字皆有味

人心有默契晤語不在多一笑離凡情萬象皆含和孰

是忘言人聽此無聲歌有懷閱古堂夢中時一過

閱古堂在

蕭山縣宅

浮雲作秋陰細雨如朝霧放形山水間意適無艱步忽

遇古招提空翠森回互倚杖聽泉鳴悠然不能去

天姥寺

小舟適久雨疎篷常自蔽形留一席間心與天地際逝

者不可作遺編等蟬蛻一念無古今千載若符契

胸中有佳處妙意不期會弄筆作五言心手無內外千

古陶淵明秀句含天籟偶然游其藩遂爾厭彫繪

淵明已黃壤詩語餘竒趣我行田野間舉目輒相遇誰云古人遠正是無來去展卷味其言即今果何處

老聃言道德頗復求自己但於閤闢機未免容或使列莊猶反約申韓遂殊軌所差適毫釐奚翅繆千里

揚雄窺聖域何啻越距楚斷然著成書準易與論語古來文字學似此奚足數誰謂千秋人斯言果輕許

王通禮法士談道則未然雖聞一字中尚倚諸子偏區

區尊孔子未悟失其傳自聖猶不疑續經何足愆

堂堂陸忠州談辯如傾河從容仁義途步武尋儒科一  
斥不復返方書事研磨至今諫草存滄溟遺一波

我行何所挾萬里一毛穎服勞髮亦禿未語意先領疇  
人如告我心清事自省從今中書君亦復免馳騁

和如愚思劔溪

佳人經歲隔參辰柳綠桃紅奈遠情遙想玉樓春睡起  
一江風日弄清明

馮元用九日約白雲寺登高以追昔年都城望津  
之會偶以事不往蒙示長篇次韻

與君都城別星霜屢變易每懷望津游悵然如有失此  
生羈旅中歲序驚心魄還家幾何時自愧不煖席建溪  
古渡頭短棹凌虛碧掀篷忽見君恍若夢中得相攜定  
舍館石徑走迂直危亭至如歸坐午及昏黑黃花笑東  
籬未許蓬蒿沒咫尺白雲樓坐阻造毫逸人生正似茲  
有志誰能必當時連鰲手至今猶挾策高才真楚璞未

技同齊瑟無心效  
騫騰自分投閒僻  
望津僮同登意氣  
那復昔

次韻酬鄧天啓

少年翰墨場自姁  
穿楊箭誰論第一  
功不數曹參戰聖  
門窺管豹一斑時  
許見棄捐憂患中  
更欲資陶鍊兩鄧  
富文采端可同席  
硯投壁或未知賈  
石誰敢銜小珣詩  
益竒出語人所羨  
過門遺新篇無乃  
思與狷我懷古作  
者臨文頻撫卷孰  
能掃千人期君當  
八面

次韻邦美叔和天啓見寄

竹風挾雨撼蓬牕靜聽秋聲轉騷寧朝來飢卧媚微涼  
叩門不作淵明乞小楫見餉有新詩七言端為吾家出  
共誰渠有古人風孰識中藏謫仙骨書如周鼓未差訛  
語效商盤仍詰屈誰與和者叔不癡落筆成章一嗟咄  
無用如今君豈樗自冠從來我非漆板筭它日儻相尋

好在山深林更密

邦美作軒  
名樗故云

三月二日泛舟下延平晚泊西芹



扁舟劣容身風浪困掀簸曲肱游華胥夢斷千山過縱  
橫波間石滿目牛羊卧秋毫儻不支巨艦忽已破篙師  
號神逸却立變衰懦我豈未之思懸知無可奈此生足  
驚憂似為天所瘳那能一生死且復耐摧挫日暮同濟人  
舉酒紛相賀一笑盡餘觴歌罷無予和

次韻令德荅天啓

小楫妙語言下筆初無難曹郎更精深一字不苟安我  
師陶靖節亦未游具藩但覺萬仞淵中有蛟龍蟠人言

失故步乃在學邯鄲平淡恐未臻先作郊島寒古來文  
墨士十九姓字漫尚賴相可否鹽梅助鹹酸

復次韻荅令德見和來詩及維摩默然之意

多言亦焉用守默良獨難維摩得此門衆生病自安當  
時許子將不造寔與蕃終以月旦評有愧申屠蟠忠良  
覆漢鼎魯酒圍邯鄲獨愛千頃陂滄波炤人寒君豈叔  
度歟胸襟江海漫自然已憤歎不須珍柚酸

用令德韻題嚴陵祠

價微良易酬器博無近用騏驎非良樂萬里誰能控蕭  
王漢中興四海倚為重誰為淵驅魚一呼百萬衆妙算  
環無端奇功射必中忘機諒未能豈數漢陰甕故人鉤  
尚直倦作儀韶鳳應無萬牛力負此丘山棟羊裘又獨  
往苦語餘嘲弄至今賣菜言空記當時夢

嚴子陵以匹夫見萬乘乃堅卧不起所謂高氣蓋  
世者又謂光武差增於往意若未甚許之則其所  
蘊豈冠鄧耿賈之儔乎司徒霸位三事而止名其

為癡光武乃以諫議大夫處子陵宜其弗屑也余  
觀湯之于伊尹武王之於呂望皆師事之故能致  
王業之隆後世貧賤屈于富貴比道遂衰聞客星  
犯帝座之事則相顧驚嘆以為甚異況於尊之為  
師乎光武于故人厚者惜乎其不知此也世疑子  
陵之去就如不得其當予謂光武不能用于陵豈  
子陵之失哉故因和令德聊以見意焉

跋子靜所藏魯直書樂天八字偈

凝師八字源則豐樂天說倡流無窮山谷眼明如日中

落筆驚電馳蛟龍誰其得之建溪翁

子靜姓也

取人所棄豈

俗同搜奇抉怪晉餘風嫉邪憤世髮上衝自我觀之案

兩重巧偷豪奪願不逢好語傳播人所攻斯言有味當

見容

政和六年七月無諍道人書附子靜所跋之後

題公叙叔舫齋

胥靡來時楫鷁夷去後舟濟川曾入夢浮海竟難留忠  
信雖堪倚行藏要自謀應同仙似秦不數勇如由水濶

風濤夕鱸肥浦嶼秋落帆如得計整棹欲何求明月時  
堪載新醪便可浮江山無盡意長艤劒溪頭

和羅仲素寄子靜長篇

蒙示所與子靜長篇論高而理正讀之感嘆不  
能自己是日偶思道來訪問以老兄安否云自  
崇福還却往龍湖而來書不及此二刹皆雪峰  
高弟所廬也豈復問道於此乎輒次嚴韻聊致  
區區之意甚不自揆也

龜山絕壑蟠豫章秀幹往往參天長十年收拾多散亡  
只有太白追蟾光知君所得不可詳宴坐鐔溪名益彰  
獨嘗為我露其銍盡掃楊墨揮韓莊邇來黃面稍侵疆  
劒藏于室矢在房分將肌肉剜為瘡猶說道心乃平常  
剜肉為瘡平常心  
是道禪家語也我欲從之挹餘芳竟坐此傳平所望

新詩謾說陋漢唐直以未畫窮羲皇豈知籥籥不自防  
欲舉萬目誰為綱况彼桀鰲非勤王安用援手登之堂  
愛君駿足如飛黃一空冀北無留良四蹄雷電方騰驤

肯如駑馬徒爭強

和子靜三絕

亭竹二首

牕外度聲風宛轉  
庭前舒影月分明  
參橫斗轉情無盡  
骨冷魂清夢不成

霜雪豈能摧勁節  
埃塵無復入虛懷  
故應淡薄無人管  
不是子猷誰復來

漁父一首




一聲橫笛起蘆花驚斷天邊鴈字斜  
白首飽諳鱸鰕美  
未能連夜網游鰕

舟中誦子靜江上之作為和二絕

月下長吟露濕衣  
謫仙嘗憶謝玄暉  
澄江一句無今古  
何似晴空獨鳥飛

子靜詩云爾

扁舟直與石相摩  
得到平流幸已多  
夜泊寒潭風不定  
更憂雷雨作驚波



默堂集卷五

欽定四庫全書

集部

默堂集卷六  
十

詳校官起居注事<sub>臣</sub>顧宗泰

主事<sub>臣</sub>呂雲棟覆勘

總校官中書<sub>臣</sub>朱 鈐

校對官助教<sub>臣</sub>蔡 鎮

謄錄監生<sub>臣</sub>張仲芳

欽定四庫全書

默堂集卷六

宋 陳淵 撰

閩縣令陳夢兆魚樂軒

有樂寧爾憂無憂乃至樂觀身見物理魚樂豈予各萬  
生擾為病安靜即良樂何以適其情已定要無虞江湖  
與此池等是泉未涸周旋苟得所是處覺寬綽君看瀕  
海民茲物困剝掠縱橫墮鈎網瑣細入杯杓誰云滄海  
廣游泳渺無託乃知尺澤間所樂逾縱壑我家一畝宮

隙地不容鑿未能禁數畧念此每懷忤陳公史之師養  
善息羣惡愛民以及魚退食此盤礴魚亦喜公來出沒  
供笑謔當年濠上游天籟紛酬酢昭琴既不鼓應問兩  
俱錯賢哉鄭國僑一物心無著但信悠然語未悟已投  
鏊懸知此魚烹不羨波間躍誰當較異同我亦無今昨  
午睡懷安縣風篁亭

旌旗蔽野堦除寂環佩鳴空枕簟涼夢斷鈞天知是想  
一溝泉落樂聲長

次韻鄧志宏送張思道游福唐

紛紛浣耳俱宜洗坐遣高人厭丘里  
迅流早自促行舟更有西風滿江葦  
當年筆陣掃千人今日流輩推能文  
英辭磊辯洒醉墨倏忽百變春空雲  
人間萬事秋毫細軒冕儻來誰著意  
身隨去棹落波間興逐冥鴻渺天際  
三山便到蓬萊宮卸帆海嶼窺魚龍  
夜涼橫笛弄明月萬頃琉璃秋色中

自京回次韻鄧志宏見贈

妙齡才思湧如泉末技文章不自賢餘子豈知多問寡  
老生端許一當千淹留莫止為山簣收拾終同至海川  
雲路筆間天尺五會令鷄犬亦能仙

翁承事挽詞五首

徐行直視日如愚律已齊家盡可書九十年由砥道  
肯令荆棘敝衣裾

不將堯舜等瞿曇簡語寧同賣菜漆惆悵老成無復見  
一時流俗止清談

公言簡而意足語人曰吾不知佛竊  
意深曉堯舜之道則佛在其中矣

苦語熏心不易忘  
它時聞教我為詳  
須知令尹多仁術  
寔自嚴君有義方

霜髯碧眼照華燈  
夾道游人避履聲  
曾是元宵隨步月

西風何忍見銘旌

是年公上元出游  
至今人追思之

樓閣溪山兩鬬雄  
中橫千丈未雲龍  
當時令尹兒啼處  
依舊東流遠七峰

泊舟延平二絕

野梅飄盡喜春歸  
又見溪桃片片飛  
醉卧暖風呼不醒



亂紅無數點人衣

星河不動水東流夜影搖空逼釣舟夢破滄浪歌在耳  
欲尋溪友向煙洲

寓漳南靜衆寺三月晦信步到庵亭曠望久之聊  
寄所感

意行不知遠倚杖囂塵外南州風物繁此地溪山會俯  
窺城市喧蟻垤幾成壤只爾可忘情未用旋吾旆

過永春劇頭鋪見壁間石刻臨漳王漕詩輒題數

句

壁間得微詞語盡意有餘摸傳豈真知無乃勢所驅從  
來碧紗籠不護寒士書焉知題柱生終無駟馬車粉板  
會當洗援毫聊自娛從人分輕重削迹今何如

次韻德純通判賀用中生子

暴客年來不過門羨君三秀各爭春懸弧適在龍溪側  
履迹知從劔水濱魯國考祥欣得鯉杜陵占夢信為麟  
問名更取詩翁語盛事流傳西狩新

德純欲名之為麟  
奴取絕筆之義故

云

次韻李伯紀舍人招飲

胸中造物可與友筆下騷人真是奴共傳排佛似遷愈  
獨喜賦梅追隱逋盤空未念鴟腐鼠在野寧無駒束芻  
時時造席聞妙語謬辱知己非夷吾

再和李伯紀舍人韻

時來將相寧有種衛青故是民家奴懸鷄未用歎歲惡  
閑網近喜除官逋

詔書近  
蠲逋負

本無得喪任失馬但有言說

皆陳芻從公一飲百壺盡醉倒不知誰謂吾

和李舍人留題泛碧齋

山脚回環插遠潯碧琉璃上玉為岑共憐采鷁風前試  
正值滄波雨後深應為尊鱸輕去國遂令胡越盡同心  
濟川此去為舟楫也念江湖有陸沉

陪知縣夜飲泛碧齋再用前韻

暑雨初收水拍潯溪光南北影千岑移舟為愛玻璃闊  
放盞那知琥珀深緩帶小風來水面倚欄涼月轉天心

酒酣更駐凌波韞直待銀河夜色沉

鉛山道中小休

秋陽如獵火四顧不可避肩輿得微陰休此僕夫瘁我  
生道途間歲月七之四山林固清遠及物乃初意黃雲  
堆壠畝早稻一尺穗所欣居者樂未敢嘆勞勩詔書寬  
逋負豪吏不少置民窮戒勿擾天下適無事

贈別楊至游

醉鄉佳處許誰臨幸有匏尊可共斟要試從前寬窄量

但知空蓋莫辭深

和平簡易是吾師自有家風更問誰  
不是妙年狂氣歇可能從我獨無疑

貪瞋癡盡即如如究竟心源一法無應悟  
濂溪真古佛始知伊洛是醇儒

次韻李伯紀舍人食了齋所寄石芝有感

石芝附石元無根有名不載農黃文  
絳囊遠致自東海謫仙為向詩中論  
談餘得味仍遭苦未辨終甘莫輕吐

此言要自顯真心不比繁辭較鍾乳太丘晚交誰獨深  
梁溪心如百鍊金只應異代友元禮許國有盟今更尋  
雙魚萬里將芹子妙意難名聊寄耳餘甘橄欖正須渠  
它日忠信今悟矣

了齋書與舍人云石芝東州物也初食淡然已而  
微苦久方發甘知此味者鮮矣宜以為獻也

書室獨坐

春入庭柯寸寸藍風簷孤坐怯輕衫青天白日從來好

栢樹桃花子細參

自浦城放船下建安寄龐幾先

扁舟西下趁殘陽  
目斷雲邊歸鴈行  
短棹莫辭風浪惡  
人間平地有羊腸

茆柴也解發清狂  
仰看雲天盡十觴  
白首歲寒猶道路  
自憐無意避風霜

奉陪婺州守南樓宴集

溪山自昔東陽勝  
賓客偏於北海多  
四坐英標真倚玉



一時雄辨劇懸河淹留慙應三刀夢豈弟仍傳五袴歌

更避正堂延蓋老待將清淨繼蕭何

公待龜山異甚故用曹相國尊蓋公

事云

奉陪龜山先生觀修城

西山<sub>赫赫</sub>送斜陽往事回頭一夢長  
萬里喜霑新雨露百年重拓舊金湯  
杵聲撼野雷初動鉦柄揮風蟻自行  
尊俎折衝今可恃補牢端為念亡羊

次韻鄧志宏和吏部謝公鐵字韻詩二首

結交自惜羞餘耳直要人情淡如水晏嬰鮑叔久已亡  
嗟我欲從誰氏子大楫筆陣掃千人詩成不顧俗士瞋  
長歌欲奪謫仙氣短韻更逼宣城真  
謫仙謂李舍人宣城謂謝吏部也  
爾來念我知交絕託以不能資老拙自笑今年雖也無  
何須更覓針頭鐵

愁霖十日槎生耳寒氣薄人如著水坐對毗耶數卷書  
未厭銅爐燒栢子區區我亦可憐人只有無求人不瞋  
雖無名字振京國不屈未應慙子真凍琴壁間絃自絕

袖手深藏鳩更拙本無流水遣誰知此去從人譏嚼鐵  
再和鄧志宏二首

石馬祠門餘隻耳夢魂先過瞿塘水人間得喪豈偶然  
可笑紛紛夸奪子文章自古多窮人妙奪造化天應瞋  
謾言勤苦得富貴見彈求鴉何日真張羅門巷行人絕  
歲晏誰憐生事拙窮通有數勿復言已辨此心堅似鐵  
先友遺書猶在耳念之清淚如鉛水可憐萬事已忘情  
獨嘗託我芝蘭子阿戎文采映前人脫畧不顧妻孥瞋

却能飲我瞑眩藥知我老大言尤真利欲昏人須猛絕  
妙年毋謂吾謀拙古來解使玉如泥劒鋌除是錕鋹鐵  
廖成伯奉議生辰

曾聽尊前世綵歌喜聞烟袖舞婆娑

用中建堂名世綵叔祖諫議有小詞

云綵衣長久五世祥煙熏舞袖故云

名駒汗血得夷路老栢凌霜只舊柯

桃李盛時隨地有芝蘭生處近人多春風二月年年事  
莫問靈椿歲幾何

交溪靜安院見許尉題壁次韻

柱頤脩劒上凌煙自古功名亦偶然鐘鼎山林俱不惡  
一瓢吾欲盡餘年

默堂集卷六

欽定四庫全書

默堂集卷七

宋 陳淵 撰

用中示以字瑞既書其事又賦詩一首

河圖布畫非人力鳥跡成文豈偶然自昔秘藏神所護  
至今陳露墨猶鮮胸襟有道推先覺斤斧無情肯自全  
但欲剖心彰景命爨桐何意擬薰絃

字瑞奇特再用前韻

春來無物不爭妍爨木呈祥孰使然應為奇文開奧突

不隨凡卉競蕃鮮  
窪隆密向睽中合  
點畫仍從毀處全  
御史說符真可驗  
從來謀國直如絃

提舉生辰

東井遙觀盾日升  
南風猶入舜絃鳴  
鵬程九萬豈終息  
椿歲八十方再榮  
平世功名期鳳鳥  
一時文采應長庚  
浮瓜沉李年年事  
稽首孤南一點明

俞憲生辰

代麗幾先

北固樓前萬頃秋  
月明風定大江流  
從來此地多英傑

果有奇才副簡求秀氣一天開夜色威名千里駕潮頭  
山川長在人難老應抱文章入相周

淮南持斧功成後甌粵乘輅喜暫臨使者英標衣蹙繡  
近臣新渥帶橫金三山氣入中秋好八郡香焚曉霧深  
已為黎元開壽域可無椿歲慰人心

耿憲生辰

象緯祥光動門弧瑞氣纏秋來孤鶴健霜近古松堅鄰  
境風煙靜新恩雨露偏輶車猶問俗寶帶獨優賢投筆



男兒志封侯烈士年老成端可恃終冀勒燕然

鄭漕生辰二首

代幾先作

至公無轍迹萬變歸諸正誰云學則然要在成以性我  
公鍾間氣異稟剛且勁一毫不容私心境自澄映超然  
是非表燭物眼常淨還將溟渤量一了百川競由來仁  
者壽茲理天所命欲知椿齡永視此寬平政桂花弄小  
春晚香適再盛年年幾望月影泛杯中聖尚書心如水  
遠裔有餘慶

鄭相也

何以繼清風家聲南北鄭

象緯祥光動門弧瑞氣盈小陽春在序幾望月偏明他  
日三千牘清時九萬程名因使粵重功自備吳成偉量  
溟波闊奇詞錦段呈褒揚看唾玉輕重倚提衡松柏真  
難老芝蘭足後生筍班行趣召金帶已先橫內史言何  
美謂鄭  
當時尚書心自清謂鄭  
崇祇應南北相謂鄭  
鄭餘慶重振舊  
家聲

唐大夫生辰

氣轉初寒候祥開既望辰應時來鸞鵲占夢獲麒麟盛

德主無玷高才竹有筠胸襟藏巨壑人物妙洪鈞使者  
光華遠朝廷寵數新鵬程九萬里椿幹八千春鼎萬虛  
前席風雲即要津黑頭紆袞繡天意在斯民

次韻運使龍圖寵示道中夜行之什

畏途千里可宵行正是鄰邦道路平諭蜀昔傳司馬檄  
備吳今罷亞夫營陰雲掃地千林出曉月凌空萬騎迎  
緩帶驛亭留險語春雷端使蟄蟲驚

次韻子靜

淵明束帶向督郵已覺歸思不可留紛紛朱墨何時休  
豈得置錐無一丘平生涉世如虛舟明月從人驚暗投  
胸次已無涇渭流不應在我緣春秋

黃兵部生辰四首

中朝人物競推先富貴前途看永年九萬里程飛正遠  
八千春歲久彌堅

南國初持使節回斑衣仍把錦新裁大椿更向萱堂祝  
長到春來共壽杯

蚤歲飛榮應宿郎至今鷄古尚含香  
未應駟馬誇流俗只為慈親樂故鄉

地上泉流府庫充艱難天與歲時豐  
他時若論關中漕合數蕭何第一功

遜齋有感

達士豈嫌祠竈請虞人安可以旌招  
由來不戀五斗米自是叩門勝折腰

戲題延平閣上

黃昏欲去更凭欄  
珍重銀蟾照膽寒  
可是歌眉能繫別  
人間無此好溪山

西風吹露濕  
我冠迴立三山  
二水間後夜江樓應殢酒  
一鉤殘月與誰看

謁羅養蒙辱示長篇次韻

它時對語聞鶯遷  
青秧離離初插田  
重來刈稻歌有年  
浪過日月將誰憐  
故人落筆生雲煙  
胸中端有萬斛泉  
從來經笥謾便便  
詩書何如一囊錢  
有時玉樹臨風前

仰視落日窺層巔已知萬古然不然得處往往多忘筌  
正須青綾護醉眠坐使士類歸埴埏不應直為尊鱸還  
夜聽秋雨窮遺編我今已辦訪戴船日欲倚棹寒潭邊  
要當學海如百川未信軻死今無傳

小詩七首寄養蒙兼呈景駿

粥魚齋鼓網蛛窠古寺長廊客少過唯有一溪明月在  
夜寒偏向斷垣多

斜陽不到竹陰幽小徑縈紆傍碧流行到草深橋斷處

却乘明月泛歸舟

它時樽酒對春風  
夜雨霏霏抵曉鐘  
但說尋常往來地  
豈知重到有丹楓

太史溪頭十里間  
朝陽峰下水涵天  
青鞋不踏紅塵陌  
夢斷僧牕又一年

才疎不下孔北海  
道廣更師陳太丘  
世路風波無着處  
却尋真隱得清游

二妙胸中萬頃寬  
詩成千字海濤翻  
已能共入淵騫室



自是同登李杜壇

晚交誰似雨龔清冰雪情懷獨老成揚粃在前容齒長  
積新居上看文鳴

翫月

據牀招佳月月轉牀屢移夜久風露涼孤斟樂忘歸冰  
輪擅空闊是處留清輝浮雲掃除盡如與賞心期我行  
萬物表中空無一疵光明徧十方毫髮了無遺心境互  
融澈起坐迷東西此生看此月十年悼無時它日客共

飲淋浪酒霑衣十語久不契此心唯自知西風掃殘暑  
秋色日益奇憂國付鼎食消閒屬山樓恐妨此時樂勿  
露囊中錐

三絕句寄幾先

陽明連絡四支中胃氣由來處處通但使黃婆能飽飯  
客邪端的不須攻

冷暖平生既自知是中無病欲誰醫但思寒熱從何得  
未用長吟譴鬼詩

敵犯東南夜壘驚却防西北有奇兵將軍堅卧鼻雷吼

七國崢嶸次第平

善治病者如周亞夫用兵守其所必攻則猝至之敵不能為害

道出南浦見蕭子莊十首

霧壓山城石徑遙  
筍輿乘月度溪橋  
已投柳舍人方起  
却訪鱸堂市未囂

牆仞未容肩可及  
豹斑時許官能窺  
相逢一笑無餘事  
明月滿懷心自知

雨絲收盡暮天涼  
萬竅號風釀曉霜  
待趁新晴出閩嶺

夜談還喜漏偏長

平生交契獨公深  
歲晚那無裹飯心  
白首它年林下約  
此盟端的幾時尋

五年重見各蒼顏  
往事紛紛醉夢間  
不為投閒多暇日  
豈能千里謁龜山

龜山涉世若虛舟  
觸處忘懷得自由  
道大不容長役役  
心閒無事只休休

了齋已復歸黃壤  
便恐人間此道微  
後代不知誰得法

祇今無復更傳衣

四海知心有幾人  
淡然今與鬼為鄰  
天下共冤渠不恨

平生憂國自亡身

子靜號淡然居士

斯文初不間衡茆  
但有玄經豈患嘲  
騏驥從他千里足

鷦鷯容我一枝巢

我在龍潭直下居  
西來應不少雙魚  
故人南浦如相憶

為寄平安尺素書

龜山了齋其道則兄弟也余與子莊子靜相與為友而師事之故詩中併

焉及

過江卽巖下少駐感而有作

三峯卓立蒼崖表朝夕雲煙自圍繞幾年不向眼中青  
忽露全身萬山曉凝然不動亘今昔陌上行入空自老  
我生悟此具已久夢事縈人嗟未了却怪神龍依絕頂  
獨以一身蟠故沼風雷際會豈無時忍視飢氓日紛擾  
未能呵汝救凶年明朝馬首霜風早

默堂集卷七